



Communicaziun a las medias

Berna 17-03-2025

Dieta davart la protecziun e la promoziun da minoritads naziunalas en Svizra

Il 17 da mars 2025 ha la cussegliera federala Elisabeth Baume-Schneider avert a Berna la 5avla dieta davart la protecziun e la promoziun da las minoritads naziunalas en Svizra. La dieta ha purschi ina plattafurma per il barat tranter las autoritads svizras, il Cussegl da l'Europa, organisaziuns da las minoritads, organisaziuns nunguvernamentalas e la scienza. En il center èn stadas la preschientscha pli ferma dal talian e dal rumantsch en il mintgadi, la protecziun da la moda da viver nomada dals Jenics e dals Sinti svizzers sco er mesiras pli rigurusas cunter il rassissem e l'intoleranza en il sector da la furmaziun.

La raschun da la dieta èn stads il 5avel Rapport statal da la Svizra al Cussegl da l'Europa e las recumandaziuns ch'il Cussegl da l'Europa ha fatg a la Svizra sin basa da quest rapport per proteger e per promover las minoritads naziunalas reconuschidas en Svizra. En vista a la realisaziun da las recumandaziuns han las participantas ed ils participants da la dieta discutà davart ils success ch'ins ha gia cuntanschi e davart las sfidas ch'existan vinavant: Tranter quellas èn per exempel la promoziun dal talian e dal rumantsch en la vita economica e sociala, la meglra protecziun da la moda da viver nomada dals Jenics e dals Sinti tras in augment dal dumber da las plazzas da staziunament sco er la prevenziun ed il cumbat rinforzà cunter il rassissem, cunter l'antisemitissem e cunter l'antiziganissem en il sector da la furmaziun cun focus sin la situaziun da las minoritads naziunalas. En ses pled da bainvegna ha la cussegliera federala Elisabeth Baume-Schneider suttastritgà l'impurtanza da la protecziun da las minoritads en ina societad democratica. Ella ha accentuà la necessitad da promover ils dretgs da las minoritads e da cumbatter la discriminaziun per pudair profitar uschia da l'entir potenzial creativ ed economic da la diversitad linguistica, etnica, culturala e religiosa.

Tar las minoritads naziunalas che la Svizra reconuscha, tutgan las personas che appartegnan a las minoritads linguisticas naziunalas, a la cuminanza gidieua sco er als Jenics, als Sinti ed als Manouches che han in domicil stabel u che pratitgeschan ina moda da viver nomada. Cun ratifitgar la Convenziun da basa dal Cussegl da

l'Europa per proteger las minoritads naziunalas l'onn 1998, è la Svizra s'obligada da proteger e da promover las minoritads naziunalas. Questa 5avla dieta è ina part dal barat regular da la Svizra cun il Cussegl da l'Europa. Ella è vegnida organisada da la Direcziun da dretg internaziunal public dal DFAE en collavuraziun cun l'Uffizi federal da cultura, cun il Servetsch per il cumbat cunter il rassissem e cun la Fundaziun «In futur per ils viaggiants svizzers».

Adressas per dumondas

Per ulteriuras infurmaziuns davart la **Convenziun da basa per proteger las minoritads naziunalas**:

Communicaziun DFAE
Chasa federala vest
CH-3003 Berna
Tel. post da medias: +41 58 460 55 55
E-mail: kommunikation@eda.admin.ch
X: @EDA_DFAE

Per ulteriuras infurmaziuns davart las **minoritads naziunalas en Svizra**

Uffizi federal da cultura
Secziun Cultura e societad
David Vitali, manader da la secziun
Hallwylstrasse 15
3003 Berna
Tel.: +41 58 465 70 19
E-mail: david.vitali@bak.admin.ch

Fundaziun «In futur per ils viaggiants svizzers»
Simon Röthlisberger, mainagestiun
Tel.: +41 31 552 13 10
simon.roethlisberger@stiftung-fahrende.ch

Per ulteriuras infurmaziuns davart il **rassissem e l'intoleranza**

Marianne Helfer
Manadra dal Servetsch per il cumbat cunter il rassissem
Tel.: +41 58 480 08 70
marianne.helferherraerazo@gs-edi.admin.ch